

NORA NOA, NAAS-MAAS?

(Zeruetako mandatua izanik...

Kanta zaarretik.)

*(Oroi zaitetz, nere bizia utsa dala, ta nere
begiak zorionik ez dutela ikusiko.*

Job VII, 7.)

Nora noa, naas-maas ni nere bidetik?

Zalantzaz betetako txara aldetik?

Naiz okerretik joan edo zuzenetik,
nabil irten eziñik gaitzaren unetik;

urrats nekezetik,

bide mukerretik,

bizitz mingotsetik,

buztiñan menpetik;

izanak ez badijoaz gozamenetik.

Mundu ontako maldak zertako salatu?

Nolatan nai zenuke gukin baliatu,

zedorrek utzi ez badu zer nun aukeratu

illuna argi ordez maiz dugu urratu;

bizitzaren tratu

mundua merkatu...

Zu zera juradu?

Guregan pekatu?

Legez, auzi onetan, nori barkatu?

Ez naiz sekulan izan iñun naaslari,

ta ainbat gutxiago gogo aurkezlari.

Zergaitikan, ordea, zoriz merkatari,

buztin autsez egiañak gizon ordezkarri?

Nekez gera ari

beti ameslari,

jarraiz argiari

gabiltz bidezkarri.

Landu zenun buztña orain pekatari?
Bazeralatan geuden utsetik etortzez,
ta zerala etzaude gure oroitzez.
Zure misterio au, agiri da zotzez.
Deitu aal banizuke aldarrika otsez.

ulermena motzez
lurretikan sortzez,
azaldurik lotsez,
diotsut biotzez:

Buztñez ein al giñan inguru otzez?

Zureganuntz opariz lotura bigunez
nai ta naiezko zaigu legeen bidez,
adierazi nairik errazoian miñez,
baña zentzua dugu gure maltzurkidez,

arnasa samiñez,
nortasun likiñez
T'ala diot ziñez,
etsitu eziñez:

Nor da gozaten duna illaz aienez?

Emen nabil tristuraz, bai egun eta gau.
Bestek ez badamate nik dedan bide au,
beronek zугanuntza urreratzen banau,
naas-maas joanarren aztertuaz berau,

naiz aldats edo lau,
asez edo barau,
iñork bere arau
bestenean ez dau.

Berak nau, ta narama, ala ere gau nau!

Bada edo ez bada, au zurrunbilloa,
Itsuki, jo-mugara... lotuz oraingoa?
Barneko kezka-miñak, dio: Zentzu, Oa!
Nora-ezean berak bultzaka naroa.

Kixkalduz gogoa,
bildurretan, noa.
An dala geroa,
Edo dana loa?

Gorpuzki au arrentzat; to, il-zuloa!

OTSALAR.